



18. august 2009

UKA 2009/32

Inatsisartut suleriaasianni § 35 naapertorlugu apeqquteqaat aallaavigalugu oqallisissiatut siunnersuut imaattoq saqqummiuppara:

Apeqquteqaat aallaavigalugu oqallisissiatut siunnersuutigaara nunatsinni meeqqat tamarmik atuarnissamik periarfissaqaralutut taamaattorli meerartatta isorliunerusuniittut nunaqarfinniittullu atuartitaanikkut periarfissaasa ilaatigut ungasianiit atuartitsinikkut, nunatta suatungaani najugaqarneq aporfiginagu nalimmassaaviginissaat qulakkeerneqarnissaallu piviusunnngortinniarlugu Naalakkersuisut periarfissat assigiinngitsut qanoq atornialersaarneraat.

(Inatsisartunut ilaasortaq Jane Petersen, Inuit Ataqatigiit)

Tunggavilersuut:

Meeqqat tamarmik ilinniagaqarnissamut assigiimmik periarfissaqartariaqarput inersimasunnngorlutik imminnut ilaquuttaminnullu pilersulernissamut piareersimasussaagamik.

Ukiormanna namminersulerpugut tamatuminnngalu nunatsinni pissutsinut naleqqussarnissamut pituttorsimavugut piумаaffigineqarlutalu.

Periarfissat soorlu ungasianit atuartitsineq aamma illoqarfinit nunaqarfinit atuartut tikillugit eqikkakkamik atuartitsissutini ataasiakkaani atuartinneqarsinnaanerannik kommunit periarfissaat qanoq atorneqartigippat?

Inerisaavik ungasianit atuartitsinermik atuutsitsilernissamut aamma atortussatigut ingerlatseriaasissamut piareersimavoq. Ungasianit atuartitsinerup atuutsinneqalernissaanut teknikkikkut atortulersuutit aporfiupput, elektroniskimik ingerlatsineq kigaappallaarmat akisuallaarlunilu.

Taamaattumik eqqarsarnarpoq ungasianiit atuartitsinerup iluani periarfissat pioreersut soorlu fjernsynikkut attaveqaatit atorlugit periarfissat kiisalu atuartitsissutinik immiussinikkut dvd-nngortitsinikkut ilisimasassanik siammarterisinnaaneq?

Maannakkut periarfissat nutaaliaanerpaaginnaat atorlugit pilersaarusiorneq tunuarsimaarfigineqartariaqartutut isumaqarfigaarput. Kaammattuutigissavarpullu periarfissat pioreersut atorluarlugit – anguniakkanik akisuallaareersunik immitsinnut inorsinnaveersaarnissarput. Ilisimavarpummi ukiuni aningaasatigut aqutsineq sukannersumik ukiuni makkunani ingerlanneqartariaqartoq.

Ukioq manna Tele Greenlandip immap naqqatigut attaveqaat atulersittussaavaa. Atulerneratigut elektronikkip aqqusinersua ammarneqartussa qanoq aqqutitigut nunaqarfinnut isorliunerusunullu aqqutit iluaquserneqassappat? Sukkanerusumik akikinnerusumillu ungasianit atuartitsineq periarfissaqalissava?

Ullumikkut atuartitsinerup aqqissugaaneratigut kommunit periarfissaqarput nunaqarfittaminni atuarfiit tikillugit ilinniartitsisui, ilaatigut kisimiillutik atuartitsinermik ingerlatsisut, peqasiullugit atuartitsissutini aalajangersimasuni eqikkakkamik (intensiv) atuartitsinissamut. Periarfissaq tamanna kommunini qanoq atorneqartiginersoq naalakkersuisut nassuiaateqarfigisinnaanerpaat?

Misissuinerit takutippaat nunaqarfinni atuartut kalaallisut matematikkimilu ilisimasamikkut illoqarfimmiunut nallersuulluarsinnaasut. Nunaqarfiilli ilaanni suli allamiut oqaasiisigut uumaatsulerinermilu atuartitsissutit inorsarfigineqarajuttut misissuinertigut uppernarsineqareerpoq.

Taamaattumik ujartorparput meerartatta isorliunerusuniittut nunaqarfinniittullu atuartitaanikkut periarfissaasa ilaatigut ungasianiit atuartitsinikkut, nunatta saatungaani najugaqarneq aporfiginagu nalimmassaaviginissaat qulakkeerneqarnissaallu pillugu maani inersuarmi oqallinnitsigut isumassarsioqatigiissasugut.